

Til:

Olje- og energidepartementet

Kaldestad 31.august 2015

Dykkar referanse:

Vår referanse: Arne Tillung

Klage på Norges vassdrags- og energidirektorat (NVE) sitt vedtak om avslag på bygging av Risbruelva kraftverk i Kvam herad, Hordaland

Me viser til brev frå Norges vassdrags- og energidirektorat (NVE sin referanse 201105566-38) om avslag på vår søknad om bygging av Risbruelva kraftverk i Kvam herad i Hordaland.

NVE si grunngjeving for avslaget er at kriteriane i vassressurslova § 25; «Konsesjon kan bare gis hvis fordelene ved tiltaket overstiger skader og ulemper for allmenne og private interesser som blir berørt i vassdraget eller nedbørfeltet», ikkje er oppfylt og NVE gir difor ikkje løyve etter vassressurslova § 8 for bygging av Risbruelva kraftverk.

Kvam Kraftverk har nøye vurdert NVE sitt avslag opp mot vår søknad, og kome fram til at me er usamde i NVE sin samla konklusjon og avslag og vil difor klage på vedtaket. Me vil her gi nærare grunngjeving for dette.

Om søkjar

Kvam Kraftverk AS er eit tradisjonelt kraftselskap som driv kraftproduksjon, omsetning og distribusjon av elektrisk kraft. Konsesjonsområde for distribusjon ligg innafor Kvam herad sine grenser. Kvam Kraftverk er heileigd av Kvam herad. Verksemda vart skipa i 1913 og omdanna til aksjeselskap i 1998. Kvam Kraftverk eig i dag tre kraftverk. Kaldestad kraftstasjon i Norheimsund, Skulafossen kraftstasjon i Strandebarm og Sekkelva minikraftverk i Øystese.

Lokal verdiskaping

Ei utbygging av Risbruelva kraftverk etter omsøkt plan vil gi om lag 5,0 GWh/år i ny fornybar energiproduksjon og vera eit bidrag i den politiske satsinga på småkraftverk.

Kvam Kraftverk har inngått avtaler med alle dei 18 grunn- og fallrettseigarane i dette prosjektet.

Eit utbygging av Risbruelva kraftverk vil gi inntekter til desse samt at det vil gi både inntekter og auka aktivitet til oss i det lokal kraftselskapet. Lønsemda i prosjektet er etter vår vurdering god.

Me meiner at NVE har lagt for lite vekt på den lokale verdiskapinga dette prosjektet representerer i si samla vurdering og konklusjon.

Vedr lokale allmenne og private interesser

Prosjektet har vore nøye utgreia og det er semje mellom alle grunn- og fallrettseigarane. Risbruelva er svært lite tilgjengeleg og vert difor ikkje nytta av allmenheita til tur- og fritidsaktivitetar. NVE har gjennomført ein brei og god høyring med felles synfaring. Me merka oss at ingen av høyringspartane var negative til prosjektet. Dette er viktig for oss som søkjar og lokalt kraftselskap.

Vår vurdering er at prosjektet slik det er omsøkt ikkje har negative verknadar for lokale allmenne og private interesser. Me meiner at NVE har lagt for lite vekt på dette i si samla vurdering og konklusjon.

Vedr miljøpåverknad

Prosjektet vil føra til redusert vassføring i Risbruelva. Kva følgjer ei redusert vassføring vil ha å sei på miljøet i elva har me sjølve ikkje grunnlag for å vurdere, men må støtte oss på uttalar frå ulike faginstansar. Kraftverket er planlagt med ei største slukeevne på 610 l/s og minste slukeevne på 20 l/s. Den uregulerte middelvassføringa i vassdraget er berekna til å vera 382 l/s. Det er føreslege ei minstevassføring på 29 l/s om sommaren (1/5 til 30/9) og 7 l/s resten av året, som tilsvarar 5 persentilen. Berekingar viser at det vil vera 58 dagar i året at vassføringa vil vera større enn største slukeevne, og 55 dagar i året av vassføringa er mindre enn minstevassføringa.

Under vår gjennomgang har me lagt vekt på å vurdere om NVE sin samla konklusjon er tilstrekkeleg balansert opp mot dei ulike faglege miljøvurderingane og at alle miljømessige sider er teke omsyn til i tilstrekkeleg grad. I denne samanheng har me funne fleire moment me meiner talar i formildande retning for miljøbelastninga ved prosjektet.

Det har vore gjennomført miljøundersøkingar av vassdraget ved fleire høve. Den biologiske mangfaldsutgreiinga i samanheng med konsesjonssøknaden vart utført av Faun Naturforvaltning i 2010. I tillegg har NVE i 2014 gjennomført ei etterundersøking i vassdraget. Me har fått oversendt eit utdrag av dei førebelse vurderingane frå denne undersøkinga. Denne viser til at det er gjort funn av raudlista mose- og lavartar som ikkje tidlegare har vore registrert. Men teksten i utdraget presiserer og at vurderingane er høgst midlertidige, har svakheiter, og er ikkje kvalitetssikra og ferdigbestemt. Registrering av naturtypar og raudlisteartar er tillagt spesielt stor vekt i denne undersøkinga. Det er lite som vert skrive om kva endra vassføring i samband med kraftverket vil få å sei for miljøet. Faun Naturforvaltning sin rapport er etter vår meining detaljert og god spesielt omkring kva endra vassføring vil få å sei for miljøet. Her gir den samla vurderinga at det biologiske mangfaldet først om fremst er bestemt av topografi, klima og berggrunn og i mindre grad av vassføring. I denne rapporten vert det og nemnt at det oseaanske klimaet er ofte viktigare enn vassføringa når det gjeld vilkåra for fuktkrevjande artar på Vestlandet.


Me meiner at NVE i sin samla vurdering og konklusjon har lagt for stor vekt på den midlertidige rapporten frå etterundersøkinga, og for liten vekt på uttalar omkring kva endra vassføring vil få å sei på miljøet i vassdraget. Vidare meiner me at tilleggsvassføring frå sidebekk Revsgjel, antall dagar med vassføring mindre enn minstevassføring og dagar med vassføring større enn største slukeevne ikkje er tillagd tilstrekkeleg vekt i formildande retning for prosjektet.

Oppsummering

Kvam Kraftverk meiner at Risbruelva kraftverk er eit godt småkraftprosjekt som både er gunstig med omsynet til lokale allmenne og private interesser, og som vil bidra til lokal verdiskaping og utbygging av ny fornybar energiproduksjon. Dei naturfaglege rapportane gir etter vår meining ikkje nokon eintydig konklusjon på at prosjektet og redusert vassføring i vassdraget har større negative konsekvensar for miljøet. Me meiner difor at fordelene med bygginga av Risbruelva kraftverk er større enn ulempene for allmenne og private interesser som vert berørt i vassdraget eller nedbørfelte.

På bakgrunn av dette ber Kvam Kraftverk om at NVE sitt vedtak vert omgjort, og at det vert gitt løyve etter vassressurslova § 8 for bygging av Risbruelva kraftverk som omsøkt.

Beste helsing:



Adm. direktør
Kvam Kraftverk AS